

Rippezwigger Fasnacht 2016

Mir sinn doch nit blöod

Verschreggt sait s Ruth bim Zmorgetee
jesses s het kai Angge meh
jetz miemer halt zem Aldi fahre
denn mir wänn jo schliesslig spare
bim Otterbach het s zwor e Stau
denn d Lisbeth, Franz und Kurt gehn au
druff in Lade Angge kaufe
mim Yfueherschyn zem Zellner laufe
und in ere Stund was hesch was gisch
bisch scho zrugg am Zmorgedisch

Bim Sepp kunnt so ne Kauf schlächt a
well är jetz z wenig mälge ka
sy Kueh griegt Buchweh und goht y
dr Hof vergamlet und scho gly
stirbt sy Heimet, s ganzi Tal
d Folge sin katastrophal
d Alp erodiert, bi Zweilütschyne
droht en erschti Schlammlawine
dr Säntis stürzt in Walesee
und gly gits kaini Alpe meh
und alles nur, well d Ruth zem spare
ständig muess no Dytschland fahre

Dr Basler Konsumänt isch geil
uff s Shopping z Lörrach und in Weil
de gherch nur Basler Dialägg
doch deent dä maischtens nit so pflägg
und im Achter hesch als s Gfyhl
die mechte hegschtemänd Asyl
doch sin s nur Konsumänte und
Lyt mit Shopping-Hintergrund

D Roche kauft sich e Lego Sagg
dä isch fir dr Herzog Jacques
d Leuthard het Atomstrom kauft
dass dr Tesla besser lauft
dr Eric Wäber isch e schlimme
kauft jetz z Dytschland Wählerstimme

är het gmaint, het är erklärt
Pegida syg e Supermärt
dr Schneider-Ammann kauft nyt y
är isch nur gärn emol drby
em Blatter Sepp isch d Fifa z vyl
är suecht bim Lidl drum Asyl
d Herzog kauft e Laiterwage
zem ihr Gäld no Lieschtel z drage
dr Eric Juillard sait ych wett
fir s Tattoo e Düsejet
d Martullo maint als Chef hesch s schwär
und kauft e Fiehrigs-Dictionnär
dr Brutschin kauft in Karsau y
doch het en kaine kennt drby
dr Levrat macht e hässig Gsicht
„der Kurs von 1 zue 12 gibt's nicht“
dr Köppel kauft sich Vorurteil
Scientology kauft Seeleheil
dr Wessels Bäragschueh mit Profil
vo däm het är jo gwiss nit z vyl
d Frau Leutenegger stoht drnäbe
si kauft e Lym zem Sässel kläbe
d Frau Arslan ka sich wie die maischte
Kurde kuum dr Aldi laische
dr Dürr kauft sich e Sheriff-Stärn
das spilt är aifach immer gärn
d Liescht'ler kaufe Chefärzt y
im Bruederholz gsehsch die denn gly
d Frau Pegoraro maint „O doch
y kauf jetz no ne Gotthardloch“
nur d Schlümpf wott kain me im Regal
sait dr Darbellay banal
und, well s das bi uns nit git
bringt ain em Somm e Zytig mit
dr Mörgeli kauft drey Skelett
die letschte Frind won är no het
dr Morin findet s schampar glatt
do het s jo Lyt zmitts in dr Stadt

Die Konsumäntekarawane
dien ys als an d Kryz-Zig mahne
jede bringt us Dytschland mit
was es schynt s bi uns nit git
und me kauft grad s dopplet y

denn me spart vyl meh drby
z Oobe wott me denn in d Stadt
denn flaniere isch jo glatt
doch denn frogsch dy nundefahne
wo sin denn die Läde ane?
z Basel in dr Freye Stross
isch jo kum me ebbis los
und me findets gar nit nätt
well me Zyt zem luege hätt
denn am Dag kasch jo nit ko
well de muesch no Dytschland go

D Ladärne-Usstellig uff em Minschterplatz isch bald s ainzig, wo no offe isch in dr Stadt. Si isch vom Mäntig z Oobe bis am Mittwoch Demorge.